

Vegni uffants al champ da teater!

Champ da teater da la Pro Svizra Rumantscha a Savognin

■ (ab) Per la terza giada envida la Pro Svizra Rumantscha (PSR) uffants rumantschs da tuttas regiuns e da la Bassa ad ina emna da teater. Quest onn ha quella lieu a Savognin e cuzza da sonda, ils 30 da fanadur enfin sonda, ils 6 d'avust 2011. Puspè han ils manaders dal champ preparà in program interessant e divertent.

Gia ils dus onns passads ha la Pro Svizra Rumantscha (PSR) organisà in'emna da teater per uffants e giuvenils rumantschs. Ils resuns ordvart positivs han intimà ella da realisar quest onn danovamain in champ da teater, questa giada a Savognin. Durant in'emna mussan Annina Sedlacek e Roman Weishaupt, ils dus pedagogs da teater, als uffants a moda fitg libra dad improvisar, da giugar figuras e da sviluppar scenas. Ensemen creeschian els uschia in toc da teater enfin a la fin da l'emna. Sper il far teater èn dentant era l'inscunter tranter ils uffants, l'aventura e las vacanzas da gronda impurtanza. Sper ils dus teatrists procuran ulteriuras trais persunas per il program accompagnant ed il bainstar dals uffants. Unic èsi che uffants rumantschs da l'Engiadina, dal Grischun central, da la Surselva e da la Bassa pon s'entupar durant ina emna e realisar comunablamain in project. Els vegnan ad udir las autras varietads rumantschas e pon uschia sa persvader ch'i va da sa chapir e da communitgar in cun l'auter. La Pro Svizra Rumantscha considerescha perquai l'emna da teater era sco contribuziun a la chapientscha ed al barat tranter ils Rumantschs e las Rumantschas. Avant dus onns avain nus conquistà las streglias e giassas dal vitg da Tschlin. L'onn passà han ils uffants raquintà las aventuras da Tredeschin en il gaud da Cumbel en la Val Lumnezia. Questa stad sa fatschentain nus cun anghels e diavels, cun il bun ed il nausch, cun il di e cun la notg, cun il cler ed il stgir, cun l'alv e cun il nair. Tge è bun? Tge è nausch? E daco è quai uschia? En las paraulas èn las connotaziuns dal «bun» e dal «nausch» fitg cler. En la realitad è quai pli cumplitgà e main cler.



Participantas e participants dal curs da teater da l'onn passà a Cumbel. MAD

Bleras giadas n'èsi betg cler a nus tge ch'è tge. E tuttina, er ils uffants fan lur experientschas. Els enconuschan il sa sentir bain insanua, igl avair conflicts cun auters. Els èn confruntads cun questas dumondas. Savens nuncunsientamain. A questas experientschas lain nus dar ina fatscha, ina figura. Anghels e diavels. Figuras fitg teatralas. Figuras claucescas. Figuras acrobaticas. Las experientschas ed aspectativas, ils siemis e desideris, las temas ed ils giavischs dals uffants stattan en il center da l'act teatral. A la fin da l'emna vegn dà ina preschentaziun dal toc per ils geniturs, fragliuns u amits. Envidads èn dentant era tut ils auters interessents e natiralmain era las habitantas ed ils habitants da Savognin.

Il champ da teater 2011 en ina survista

data: sonda, ils 30-07 enfin sonda, ils 06-08-2011 (igl 1. d'avust han ils uffants la pussaivladad dad ir a chasa e festivar cun la famiglia u da restar a Savognin e festivar cun la gruppa da teater)

lieu: Savognin

alloschi: Villa Aurora

custs: 350 francs per persuna; a commembers da la Pro Svizra Rumantscha vegn concedi ina reducziun da 30 francs per uffant. Il prezi per uffants dal

lieu che vulan ir a durmir a chasa munta a 250 francs.

persunas da contact:

Arno Berther, Via Surrein 4, 7188 Sedrun,

arno.berther@bluewin.ch,

president PSR

Annina Sedlacek, 7554 Sent, anninadibina@yahoo.de, actura Roman Weishaupt, 7145 Degen, roman.weishaupt@gmx.ch, pedagog da teater

annunzias en scrit a:

Pro Svizra Rumantscha, p. m. Patricia Derungs, Casu, 7164 Dardin, u psr@rumantsch.ch

termin d'annunzia: 30-06-2011

La cifra da participantas e participants è limitada a 30 uffants. I vegn prendi resguard che tut las regiuns rumantschas sajan represchentadas adequatamain.